

Reaccion

E auto mester a dal, e victima mester a cruza caminda, dos cabayero a atraca un lugar

Unda nos ta bay cu nos dushi Papiamento

ORANJESTAD(AAN) Den bida nos tur ta comete eronan y mayoria hende ta siña di nan eronan y na caminda nan ta percura pa cambia loke mester worde cambia, pero tin hende simplemente sea no kier cambia o nan no ta realiza ki eronan barbaro nan ta comete den publico y haci nan mes ridiculo.

Titi tabata hala atencion di nos tur ora cu nos maltrata nos dushi idioma Papiamento, pero na lugar cu cierto voceronan na Aruba siña di loke Titi ta señala y cuestiona pa despues coregi, nan ta haci lo contrario door di sigui pega barco y ta parce cu nan kier haci cos bira peor cada biaha.

Door cu cierto personanan clave den nos comunidad ta sigui comete e mesun eronan cada biaha via medianan di comunicacion, na un dado momento pueblo ta bay tuma over e mal ehempel y den un tempo relativamente cortico e eronan ta bira algo comun y coriente y te hasta acceptable y ey ta caminda cu e peligro ta sinta cu bo idioma ta worde malamente cambia y influencia.

Ta parce cu no ta pasa un siman cu pueblo ta haya di tende con voceronan di cierto departamento di gobierno ta relata informacionnan na un forma malisimo pa pueblo.

Ensan cu mas ta pega barco ta politiconan, vocero policial y otro voceronan di diferente departamento cu ta cay bao di gobierno y ta parce cu na a duna nan mes un sorto di patent riba e tereno aki.

Vocero policial keto bay no ta compronde cu e forma con e ta relata o duna informacion na prensa relaciona cu un accident cu a caba di tuma lugar, ta completamente for di sla pasobra e Papiamento cu e ta uza ta malisimo.

Pa ilustra ki eronan barbaro ta ser cometi, nos ta ripiti cierto for-

manan con e vocero ta duna informacion.

Un periodista ta haci pregunta na vocero policial;

“Kico a pasa ayera anochi?”

Vocero policial: “Wel ta asina cu ayera anochi pa mas o menos or un accident MESTER a tuma lugar. caminda cu un auto MESTER a dal un peaton. kende MESTER a cruza caminda ... y a consecuencia di e impacto e peaton MESTER a muri etc etc.

Otro-casonan manera atraco: Vocero policial ta relata: “Dos CABAYERO lo MESTER a asalta un banco, caminda nan MESTER a bay cu un suma grandi di placa etc etc.

Otro caso: “Polis a bay atende un caso di maltrato caminda cu un CABAYERO MESTER a maltrata un dama etc etc.

E palabra MESTER ta worde mal uza cada biaha door di voceronan (incluyendo diferente vocero policial den pasado!) cu mester duna informacion na prensa, pero e vocero di polis ta gana prijs cu e palabra MESTER.

E chofer di auto no tabata tin ningun obligacion pa dal e peaton y na momento cu un vocero declara cu e chofer MESTER a dal e peaton, e vocero ta duna di conoce cu e chofer tabata tin un obligacion pa dal hende riba caminda; fout fout fout!

E peaton MESTER a cruza caminda! Ta kende a obliga e peaton cruza caminda net na e momento ey, cu auto por a dal e?

E peaton MESTER A MURI! Ah asina? E tabata tin obligacion pa muri o no tabata tin mag di keda bibo? E pover persona no tabata tin otro opcion cu e tabata obliga pa muri?

Esta tristo cos ta na Aruba cu te hasta murimento a bira un obligacion cu bo ta haya tira riba bo

cabes, cu bo kier o no kier pasobra otro hende ta determina pa bo cu bo mester muri!

Dos cabayero MESTER a atraca un banco! Nan tabata tin un o otro obligacion pa atraca e banco, kende a obliga nan, nan por bisa hues cu nan a ser obliga?

Ta ki dia un CABAYERO ta atraca un banco? Ta criminalnan y elementonan negativo so den nos comunidad ta comete tipo di actonan asina y no un CABAYERO!

Polis a bay atende un caso caminda cu un CABAYERO mester a maltrata su ESPOSA!

Ah, asina? E persona tabata tin obligacion pa maltrata su casa (NO ESPOSA!)? Kiermen cu e por sali liber di tur acusacion pasobra el worde obliga!

Un persona cu por ser yama un CABAYERO, ta maltrata su casa?

Ningun CABAYERO cu por carga dignamente e titulo di CABAYERO ta bay maltrata su

casa pasobra ta hombernan sin gevoel y sinberguenza so ta maltrata nan casa.

Otro pifia grandi cu Papiamento den prensa mes, incluyendo DIARIO tambe, ta ora cu ‘periodistanan’ ta bisa o skirbi cu nan a SOSTENE un entrevista cu un persona!

Bo no ta SOSTENE un entrevista cu un hende pasobra bo ta haci un entrevista cu un hende.

“Nos a SOSTENE un entrevista cu ...! Ah, asina? Kiermen cu bo mester a wanta e entrevista pa e no cay o dal abao!

Na radio emisoranan nan ta bisa cada biaha ora cu nan ta bay pa pasa propaganda; “Nos ta bay Ariba”

Ariba, na unda? Riba dak di e emisora?

E asunto di “Nos ta bay Ariba” ta algo cu a ser copia di un canal di television na Venezuela for di

hopi tempo pasa ora cu na e canal di television nan tabata anuncia cu nan ta bay over pa propaganda, cu nan ta bay Ariba pa despues bolbe cu e programa normal, pero den nan caso nan tabata referi riba e studio di propaganda cu tabata riba e piso mas halto di e edificio, pero na Aruba nos a tuma cos over sin pensa y te awe nos ta pega barco mahos cu e baymento Ariba.

Awe sigur algun hende lo haya hopi mal beis ora cu nan lesa di nan pifianan cu nan ta comete cu nos idioma, pero ta di spera cu nan ta compronde cu loke ta ser treci dilanti awe ta pa laga nos tur compronde, proteha y cuida nos dushi Papiamento, cual idioma ta ser papia en general riba solamente tres isla chiquito na mundo y esey ta haci nos hendenan hopi unico y no laga nos caba cu e idioma unico aki